

Nama Kolum: Perbendaharaan Rahsia Raja (19)

Nama Pena: Bonda Tun

Tarikh: 20/06/17

Bismillahirrahmanirrahim

Antara kesilapan orientalisme dalam kajian sejarah ketamadunan dan peradaban Nusantara adalah dengan memberikan tafsiran-tafsiran yang salah pada data-data sejarah, khususnya dari aspek pemerintahan, agama dan sosio-budaya. Antara sebabnya adalah dengan membingkainya pada kerangka pandangan alam Barat pada sesuatu istilah yang sepatutnya difahami dalam kerangka pandangan alam Islam dan Melayu. Kesilapan sebegini telah memberikan impak negatif kepada masyarakat kerana dalam kajian ilmu *Neuro Linguistic Programming* (NLP), salah kalimat akan menyebabkan kesalahan dalam berperilaku baik perilaku fikir mahupun perilaku emosi.

Satu contoh adalah apabila mengatakan bahawa sistem feodal sebagai sistem pemerintahan Raja-raja Islam, contohnya sistem Raja-raja yang berkerajaan di Alam Melayu dahulukala. Hakikatnya, sistem feodal merupakan sistem pemerintahan monarki di Eropah, tidak sama ciri dan konsepnya dengan sistem Raja-raja Islam.

Dalam hal ini, adalah lebih tepat untuk mengistilahkan sistem Raja-raja Islam dahulukala sebagai mata rantai daripada Khulafa' Rasulullah saw, iaitu sebagai pengganti baginda dalam hal urusan menjaga dunia dan agama umat Islam, Walaupun kadangkala wujud percanggahan diantara teori dan realiti sebenar, namun ianya tidak menidakkan sistem Raja-raja Islam sebagai sistem yang paling menepati ciri-ciri *Fiqh al Siyasi*, iaitu kaedah bagaimana sesebuah negara itu diperintah mengikuti landasan syariat. Perkara ini telahpun dihuraikan oleh alim-ulama ahlussunnah wal jamaah yang muktabar Antara rujukan utama adalah kitab Abu Al-Hasan Aliy bin Muhammad bin Habib Al-Basriy Al-Baghdadi Al-Mawardi, *Al-Ahkam Al-Sulthoniyyah Wa Al-Wilayah Al-Diniyyah (Hukum-hukum pemerintahan dan kekuasaan agama)*, yang telah disusun beratus-ratus tahun lalu dan dijadikan panduan oleh ramai umara dan ulama silam dalam proses mendirikan sebuah kerajaan bercirikan pentadbiran Islam.

Sistem feodal adalah sistem dan pengalaman terkait monarki di Eropah, yang sudah tentu tidak sama dengan sistem dan pengalaman daulah-daulah yang bercirikan *Fiqh al Siyasi*. Apabila sistem Raja Islam disamakan dengan sistem feodal, maka ianya akan memberikan konotasi negatif sekaligus mencetuskan persepsi salah dan sikap prejudis, kerana di Eropah sistem feodal sering dikaitkan dengan kezaliman golongan bangsawan, menyengsarakan rakyat jelata yang menjadi hamba kepada golongan tuan tanah ini

Dalam konteks pemerintahan umat Islam, perlu ada pengkajian semula apakah sebenarnya sistem Raja-raja Islam seperti sistem Raja-raja Melayu

tradisional, dikupas dari sudut pandang *Fiqh al Siyasi*. Rujukan pada kitab seperti *al Ahkam al Sulthon* oleh al Mawardi, *Nasihatul Muluk* oleh al Ghazali & *Thamarat al Muhimmah* daripada Raja Ali Haji dan sebagainya, akan jelas terpamer bahawa sistem pemerintahan Alam Melayu suatu masa dahulu banyak menepati ciri *Fiqh al Siyasi*, dan sama sekali tidak menyamai dengan sistem feudalisme Eropah,

Contoh lain adalah konsep 'Daulat Raja' yang banyak dikaitkan dengan sistem Raja Melayu dahulukala. Ianya juga sering disalah tafsirkan mengikut penterjemahan golongan orientalis yang berlatarbelakangkan agama serta adat budaya yang berbeza daripada masyarakat Melayu Islam di rantau ini, hatta sesetengahnya mempunyai agenda buruk yang tersembunyi (rujuk sejarah orientalisme) dalam menyelewengkan sejarah umat Islam.

Orientalis mentafsir Raja Melayu yang berdaulat, dianggap 'kebal' dalam adat & kepercayaan orang Melayu dahulu, seumpama kepercayaan Hinduisme yang menganggap Raja Hindu sebagai jelmaan dewata. Orientalis dan anak didik mereka tidak dapat memahami konsep Daulat Raja selain menggunakan kaca mata Hinduisme untuk mentafsirkan konsep ini, seperti juga salah faham mereka pada konsep seperti 'tulah' dan 'derhaka'

Sekali lagi bayangan sistem feudalisme juga mencorak tafsiran Daulat Raja, kerana dalam sistem feudalisme juga, golongan bangsawan dilihat mulia dan seolah-olah kebal kerana dianggap sebagai '*Divinely Anointed*', iaitu golongan istimewa pilihan Tuhan. Sedangkan rakyat jelata adalah hina dan tidak mempunyai hak berbanding golongan bangsawan. Dalam sistem feudalisme juga golongan gereja membuat hukum-hakam agama sesuka hati mereka, sehingga berleluasa kezaliman dan kekejaman kepada rakyat jelata, contohnya pada era *Inquisition* di Sepanyol oleh golongan Feudal dan gereja Katolik.

Jika konsep 'Daulat Raja' ini dinisbahkan kepada ajaran Islam, ianya perlu dilihat dalam dua konteks, iaitu sebagai *Khulafa' Rasulullah* dan *Zilullah fil ard*, yang perlu dihuraikan dalam kerangka *Fiqh al Siyasi* dan *Tauhid Makrifat* (khususnya terkait asma, sifat dan af'al Allah yang dipantulkan kepada hambaNya yang telah ditakdirkan duduk pada martabat ulil amri), Untuk memahaminya, sudah tentu memerlukan pentafsiran, penilaian serta penjelasan rapi daripada ulama arifbillah yang mendalami keseluruhan tiga Rukun Agama, iaitu ILMU TAUHID, FIQH & TASAWUF.

Pentafsiran, penilaian dan penjelasan dibuat mengikut Hukum Akal & Naqal, berdasarkan Quran, Hadith, Ijma dan Qias, tidak sepertimana para paderi Kristian yang membuat berbagai tafsiran serta 'fatwa-fatwa' mereka mengikut hukum akal dan nafsu mereka (kerana tidak bersumber daripada Wahyu). Sehingga 'fatwa-fatwa' yang dibuat banyak menyengsarakan rakyat jelata di era *Inquisition*. Kekejaman feudalisme Eropah berlarutan selama beberapa abad sehingga akhirnya mencetuskan gerakan *Renaissance*. rakyat bangkit membuat revolusi, membuang sistem monarki dan menegakkan sistem demokrasi sekular bermula abad ke 18 Masihi.

Maka dalam konteks fahaman arus perdana masyarakat kita, rata-rata kesilapan juga wujud dalam mentafsirkan konsep 'Daulat Raja' dalam hubungkait

dengan pengalaman kesultanan-kesultanan Melayu zaman dahulu kerana tidak dinisbahkan pada dalil aqal dan naqal yang benar, ianya perlulah diselidiki semula, kali ini mengikut kaedah yang tepat, bukan dalam kerangka pandangan alam Hinduisme mahupun feudalisme Eropah. Kerana dahulu, alim-ulama yang menasihati raja di Alam Melayu bukan calang-calang ulama, mereka bukan sahaja golongan ahlussunnah wal jamaah, tetapi juga bertaraf arifbillah, waliyullah sekaligus diiktiraf oleh dunia Islam. Mereka juga dijadikan sumber rujukan dalam pembangunan ketamadunan serta peradaban Alam Melayu. Maka Daulat Raja perlu dilihat daripada tafsiran dan kayu ukur mereka.

Wallahu 'alam bissawab